

De veeverloskundige en wat tur nog meer bie komt kieken



Vrogger gungen zu niet zo gauw naor de veearts as zu un koe han die niet vaneigen wou kalven, die keerl was nogal priezug en deftug begriepen julie wel?

In de buurt han zu wel un boer die veul ervaoring en geduld had met koenen en zoggen en oek wel met merrie's die hun jongen kwiet mossen en dat niet zo vlot gaon wou. Mien grootvao, Dirk van Loo van de "Klinkenbarg" war zo'n veeverlosser in de jaoren veur de 2de wereldoorlog, en zun opvolger was Aolt Ruuter van de Buutenbrinkweg/hoek Horsterweg, tot in de jaoren zestig het hie ut vol 'ehouwen.

Naomens de warkgroep Dialect en Folklore, Keesjan van Loo

In ut veurjaar was mien grootvao daor soms dag en nacht arg druk mee. Op de fiets vaneigen deur weer en wiend, bie nacht en ontie mos hie zun bed uut as tur weer un boer an de luuken van de heerd " want daor sleupen zu in de bedstee" stung te bonken, want tillufoon han zu niet dat begriep je wel. Ut gung meestal um un koe die mos kalven en dat niet op schieten wol.


Vaak han zu al un hele tied an ut martelen 'eweest, mar dan zeijen zu, gao Dirk van Loo mar haolen.

In veul gevallen gung ut um un verkeerde ligging van ut kalf, as dat verheulpen was gung ut haost altied goed.

Un enkele keer gung ut niet goed, as ut kalf te groot en te zwaor was, dan mos de veearts der bie kommen en werd ut

kalf dur uut ' ezaagd (dat was un dun staoldraadje die zu um ut calf deejun in de koe en deur die staoldraad heen en weer te doen as un zaag kwam ut calf an brokken dur uut), want vrogger han zu nog geen keizersnee zoas noen. Mien grootvao werd oek wel us 'ereupen as tur un koe niet goed was, zeeg mar un beetje ziek, hie had dan un probaat middel....het aoderlaoten, hie had daor un ampant dingetjun veur, ut aoderlaoten heulp vaak goed. (op de foto ut attribuuut veur ut aoderlaoten)

Nog zo'n kwaol bie koenen was as zu op stal kwammen in de harfst dan kregen zu de" wiend " oek wel deur de veearts "trommelzucht" 'eneumd, de koenen han dan vaak te veul stoppel-



knollen 'evreten, daor deur han zu te veul gasvorming in de pens 'ekregen. Daor han zu oek wel un oplossing veur, met kracht stoten zu un soort pen " die worren 'emaakt van un bot dat hol was en waor un mooie punt an 'emaakt was" dwars deur ut vel in de pens, dan kos ut gas ontsnappen,(op de foto de pen waordeur ut gas kos ontsnappen) oek gebruikten zu wel us un scheer in plaots van zo'n bot/pen, deur te drijen met de scheer kreej wat ruimte en ut gas kos ontsnappen, oek prebeerden zu wel us un stuk gummieslang deur de bek in de pens te kriegen waor deur ut gas kos ontsnappen.

Oek worren mien grootvao wel 'evreugen um te kommen helpen bie ut keujen sniejen (is castreren).

